

**VENDIM**  
**Nr.191, datë 22.3.2007**

**PËR VENDOSJEN E OPONENCËS TEKNIKE SHTETËRORE PËR PROJEKTET E  
NDËRTIMIT TË HIDROCENTRALEVE, ME KONCESION**

Në mbështetje të nenit 100 të Kushtetutës, të ligjit nr.7961, datë 12.7.1995 “Kodi i Punës i Republikës së Shqipërisë”, të ndryshuar, të ligjit nr.9367, datë 7.4.2005 “Për parandalimin e konfliktit të interesave në ushtrimin e funksioneve publike”, të neneve 4, 6, 8 e 18 të ligjit nr.8402, datë 10.9.1998 “Për kontrollin dhe disiplinimin e punimeve të ndërtimit”, të neneve 21 e 27 të ligjit nr.8379, datë 29.7.1998 “Për hartimin dhe zbatimin e Buxhetit të Shtetit të Republikës së Shqipërisë” dhe të ligjit nr.9645, datë 27.11.2006 “Për Buxhetin e Shtetit të vitit 2007”, me propozimin e Ministrit të Ekonomisë, Tregtisë dhe Energjetikës, Këshilli i Ministrave

**VENDOSI:**

1. Për të gjitha projektet e propozuara për ndërtimin e hidrocentraleve, me koncesion, nga personat privatë, fizikë apo juridikë, të huaj apo vendas, të bëhet oponenca teknike shtetërore.

2. Oponenca teknike shtetërore për projektet e parashikuara në pikën 1 të këtij vendimi, të bëhet nga një grup ekspertësh të shquar në fushën e inxhinierisë, hidroteknike e gjeologjike, ekonomistë dhe juristë. Ky grup nuk do të jetë më shumë se 16 ekspertë. Emërimi i tyre dhe mënyra e funksionimit të këtij grupi bëhen me udhëzim të Ministrit të Ekonomisë, Tregtisë dhe Energjetikës.

3. Grupi i ekspertëve do të bëjë vlerësimin e projekteve për shfrytëzimin optimal të burimeve ujore, si dhe do të kryejë kontrollin teknik të projekteve, sipas kërkesave të parashikuara në ligjet nr.8093, datë 1.3.1996 “Për rezervat ujore”, të ndryshuar, dhe nr.8402, datë 10.9.1998 “Për kontrollin dhe disiplinimin e punimeve të ndërtimit”.

4. Grupi i ekspertëve, pas përfundimit të oponencës, harton raportin përkatës, i cili shqyrtohet dhe miratohet, me shumicë votash, nga këshilli drejtues i Agjencisë Kombëtare të Burimeve Natyrore. Materiali i oponencës, së bashku me raportin e miratuar, është pjesë e dokumenteve, që i dërgohen Autoritetit Kontraktues, për vazhdimin e procedurave.

5. Grupi i ekspertëve të shpërblehet, si më poshtë vijon:

a) Kryetari 100 000 (njëqind mijë) lekë në muaj;

b) Anëtarët 90 000 (nëntëdhjetë mijë) lekë në muaj.

Grupit të ekspertëve t’i shtohet 10 për qind e vlerës totale të shpërblimit, për përballimin e shpenzimeve operative.

6. Grupi i ekspertëve për të gjithë periudhën e kryerjes së oponencës teknike lidh kontrata pune me Agjencinë Kombëtare të Burimeve Natyrore.

7. Ministrisë së Ekonomisë, Tregtisë dhe Energjetikës, në buxhetin e miratuar për vitin 2007, t’i shtohet fondi prej 15 950 000 (pesëmbëdhjetë milionë e nëntëqind e pesëdhjetë mijë) lekësh, për të përballuar pagesat e grupit të ekspertëve deri në fund të vitit 2007.

8. Ky fond të përballohet nga fondi rezervë i Këshillit të Ministrave.

9. Ngarkohet Ministria e Ekonomisë, Tregtisë dhe Energjetikës për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

**KRYEMINISTRI**  
**Sali Berisha**

**TERMAT E PËRGJITHSHME TË KONTRATËS (TIP) TË PUNËS, PËR KRYERJEN E  
OPONENCËS TEKNIKE “PËR PROJEKTET E NDËRTIMIT TË HEC-EVE, ME KONCESION”**

## Neni 1

### **Qëllimi**

1.1 Këto kushte të përgjithshme të kontratës (KPK) do të zbatohen për kryerjen e oponencës teknike “Për projektet e ndërtimit të HEC-eve, me koncesion” nga grupi i ekspertëve.

## Neni 2

### **Përkufizime**

Në kuptim të kësaj kontrate jepen këto përkufizime:

3.1 “Kontratë” do të thotë marrëveshja e shkruar e lidhur midis grupit të ekspertëve dhe METE për kryerjen e oponencës teknike “Për projektet e ndërtimit të HEC-ve, me koncesion”.

3.2 “Çmim kontrate” do të thotë çmimi që i paguhet grupit të ekspertëve në bazë të vendimit të Këshillit të Ministrave nr.191, datë 22.3.2007 “Për vendosjen e oponencës teknike shtetërore për projektet e ndërtimit të HEC-ve me koncesion”.

3.3 “Objekt i kontratës” do të thotë kryerja e oponencës teknike për projektin/projektet e ndërtimit të HEC-eve me koncesion.

3.4 “Palë(t)” do të thotë nënshkruesit e kontratës që janë METE dhe grupi i ekspertëve, të miratuar me urdhër të Ministrit.

3.5 “Autoriteti Kontraktor” do të thotë METE.

3.6 “Kontraktues” do të thotë grupi i ekspertëve.

3.7 “Shërbime” do të thotë të gjitha detyrat që do të kryhen nga kontraktuesi sipas kontratës.

## Neni 3

### **Hartimi i kontratës**

4.1 Ekzistenca e kontratës do të konfirmohet me nënshkrimin e dokumentit të kontratës duke materializuar të gjitha marrëveshjet midis palëve.

## Neni 4

### **Praktikat korruptive dhe konflikti i interesit**

5.1 Kontraktuesi nuk duhet të ketë lidhje (të tashme ose të shkuara) me asnjë subjekt që paraqet projektin për oponencë. Në rast të konstatimit, kontraktuesi detyrohet të vetëpërgjashtohet nga kjo oponencë.

5.2 Kontraktuesi lejon Autoritetin Kontraktues të inspektojë punën e kryer në zbatim të kontratës.

5.3 Autoriteti Kontraktues, në rast konstatimi të pikave të mësipërme, ka të drejtë të kërkojë pavlefshmërinë ose përsëritjen e oponencës me ekspertë të tjerë.

## Neni 5

### **Informacioni konfidencial**

6.1 Kontraktuesi dhe Autoriteti Kontraktor duhet të mbajnë në konfidencë të gjitha dokumentet, të dhënat dhe informacionet e tjera të dhëna nga pala tjetër në lidhje me oponencën.

## Neni 6

### **Detyrimet e përgjithshme të kontraktuesit**

7.1 Kontraktuesi duhet t’i kryejë shërbimet dhe të përmbushë detyrimet e tij me të gjitha përpjekjet, efçente dhe ekonomike, në pajtim me teknikat dhe praktikat profesionale të pranura në përgjithësi.

7.2 Kontraktuesi duhet të ndjekë praktika të shëndosha të biznesit dhe të përdorë teknologji të avancuar dhe të përshtatshme, si dhe metoda të sigurta.

7.3 Nëse kontrata kërkon kryerjen e shërbimeve këshillimore profesionale, Kontraktuesi duhet të veprojë gjithmonë si një këshillues besnik i Autoritetit Kontraktues, në pajtim me rregullat dhe kodin e sjelljes së profesionit të tij dhe duhet që të mbështesë dhe të ruajë gjithmonë interesin publik.

7.4 Nëse kontrata kërkon kryerjen e shërbimeve këshillimore profesionale, Kontraktuesi duhet të ushtrojë kujdes të plotë në marrëdhëniet me palët e treta, duke përfshirë median, dhe nuk duhet të marrë pjesë në veprime që janë jashtë kompetencës së tij në përfaqësimin e Autoritetit Kontraktues.

7.5 Kontraktuesi duhet të kryejë të gjitha shërbimet siç specifikohet te kontrata.

7.6 Kontraktuesi duhet t'i paraqesë Autoritetit Kontraktues të gjitha shërbimet, në sasi të përcaktuara, siç kërkohen nga kontrata, duke përfshirë, por jo të kufizuara nga, të gjitha raportet, dokumentet, studimet, skicimet dhe planimetritë.

7.7 Nëse kontrata kërkon shërbime skicimi, Kontraktuesi duhet të përgatisë të gjitha specifikimet dhe skicimet, duke përdorur sisteme të pranura dhe të njohura në përgjithësi të pranueshme për Autoritetet Kontraktuese dhe të marrë parasysh standardet më të fundit.

7.8 Kontraktuesi duhet të sigurojë raportet në zbatimin e shërbimeve siç kërkohet në kontratë dhe ia paraqet atë Autoritetit Kontraktues.

#### Neni 7

### **Vendndodhja**

8.1 Puna do të kryhet në vendin ose vendet e specifikuara në kontratë.

#### Neni 8

### **Siguracioni i përgjegjësisë profesionale**

9.1 Kontraktuesi duhet të mbajë siguracion për përgjegjësi profesionale, sipas rregullave dhe praktikave të njohura në përgjithësi për profesionin, për ta zhdëmtuar Autoritetin Kontraktues për dëme të rezultuara nga neglizhenca, gabimet ose mangësitë, në kryerjen e shërbimeve.

9.2 Nëse nuk është përcaktuar në kontratë shuma minimale e siguracionit, Kontraktuesi duhet të sigurojë siguracion në shumën e njohur në përgjithësi si të mjaftueshme nën rrethanat e shërbimeve që po sigurohen.

#### Neni 9

### **Çmimi i kontratës**

10.1 Çmimi i kontratës duhet të jetë shpërblimi i ofruar në vendimin e Këshillit të Ministrave nr. \_\_\_\_\_ datë \_\_\_\_\_ "Për projektet e ndërtimit të HEC-eve, me koncesion".

#### Neni 10

### **Afatet e pagesës**

11.1 Çmimi i kontratës, duke përfshirë çdo pagesë paraprake, duhet të paguhet në kohë, siç specifikohet në kontratë.

11.2 Me përjashtim kur parashkohet nga një dispozitë tjetër në kontratë, pagesa duhet bërë në monedhë shqiptare.

11.3 Data e pagesës do të jetë dita që fondet debitojnë nga llogaria e Autoritetit Kontraktues.

#### Neni 11

### **Vonesa në zbatim dhe zgjatja e afatit**

12.1 Me përjashtim kur parashkohet ndryshe, Kontraktuesi duhet të fillojë zbatimin e kontratës menjëherë pas nënshkrimit të saj.

12.2 Me përjashtim të rastit kur Autoriteti Kontraktues është dakord për zgjatje të afatit të kontratës, Autoriteti Kontraktues ka të drejtë të likuidojë dëmet për vonesën në zbatim, nëse Kontraktuesi dështon në kryerjen e shërbimeve brenda periudhës së kontratës.

12.3 Autoriteti Kontraktues mund të zbresë shumën e dëmeve të likuiduara që duhet paguar nga shuma e pagesës ndaj Kontraktuesit. Në rast të tillë Autoriteti Kontraktues duhet t'i japë kontraktuesit njoftim me shkrim për shumën dhe arsyen e zbritjes.

12.4 Autoriteti Kontraktues do të jetë dakord për një zgjatje të afatit në rastin e forcës Madhore.

12.5 Autoriteti Kontraktues mund të jetë dakord për zgjatje të afatit edhe në rrethana të tjera nëse është në interesin publik për ta bërë këtë.

12.6 Të gjitha pikat e mësipërme përcaktohen me hollësi në kontratë.

#### Neni 12 **Penalitete**

13.1 Në kontratë palët do të parashikojnë konkretisht penalitetet për rastet e dorëzimit me vonesë të oponencave, si dhe moskryerjen e tyre për faj të kontraktuesit.

13.2 Masa e penalitetit dhe mënyra e pagesës së tij do të specifikohen në kontratë.

#### Neni 13 **Negociatat dhe amendamentet**

14.1 Palët kanë të drejtë të negociojnë, të bëjnë ndryshime ose amendamente për kushtet e kontratës.

14.2 Kushtet e negocimit dhe amendimit specifikohen në kontratë.

14.3 Çdo heqje dorë nga të drejtat, pushtetet ose ndreqjet që mund të bëhen nga palët sipas kontratës duhet të bëhet me shkrim, të ketë datë dhe të firmoset nga një përfaqësues i autorizuar i palës që bën këtë dorëheqje dhe duhet të specifikojë të drejtën dhe masën në të cilën ajo lëshohet.

#### Neni 14 **Nënkontrata**

15.1 Nuk lejohet lidhja e një nënkontrate nga kontraktuesi.

15.2 Kontraktuesi nuk duhet të transferojë, tërësisht ose pjesërisht, detyrimet e tij sipas kontratës, me përjashtim kur jepet miratimi paraprak i Autoritetit Kontraktor.

#### Neni 15 **Baza ligjore**

16.1 Kontrata do të qeveriset nga dhe interpretohet sipas ligjeve të Republikës së Shqipërisë.

#### Neni 16 **Zgjidhja e mosmarrëveshjeve**

17.1 Autoriteti Kontraktor dhe Kontraktuesi duhet të bëjnë çdo përpjekje të zgjidhin mosmarrëveshjet ose konfliktet e ndodhura midis tyre ose në lidhje me këtë marrëveshje me negociata direkte.

17.2 Nëse palët dështojnë në zgjidhjen e mosmarrëveshjes ose konfliktit, problemet do të konsiderohen me anë të zgjidhjes së marrëveshjeve sipas kontratës dhe procedurave juridike në fuqi sipas legjislacionit të Republikës së Shqipërisë.

#### Neni 17 **Përfaqësimi i palëve**

18.1 Çdo palë duhet të emërojë me shkrim një person ose post organizativ, që do të jetë përgjegjës, në emër të palës, për marrjen e komunikatave dhe për përfaqësimin e palës në çështjet e lidhura dhe ekzekutimin e kontratës.

18.2 Secila palë duhet të lajmërojë palën tjetër menjëherë për ndonjë ndryshim në emërimin e përfaqësuesit të palës. Nëse njëra palë dëshiron të lajmërojë, duhet të marrë përsipër çdo humbje të shkaktuar nga dështimi për të dhënë njoftim të mjaftueshëm.

18.3 Palët mund të emërojnë persona ose njësi organizative shtesë për të përfaqësuar palën në veprime ose veprimtari të veçanta njoftimi me shkrim në të cilin rast duhet dhënë dhe duhet të përcaktojë shtrirjen e Autoritetit të përfaqësuesit.

Neni 18  
**Lajmërimet**

19.1 Çdo lajmërim i dhënë nga njëra palë tjetrës sipas kontratës duhet të bëhet me shkrim në adresën e specifikuar në kontratë.

19.2 Njoftimi do të ketë efekt sapo të dorëzohet.

Neni 19  
**Llogaritja e afateve**

20.1 Të gjitha referencat e ditëve do të jenë ditë kalendarike, me përjashtim kur parashikohet ndryshe.